

**Zeitschrift:** Igl Ischi : organ della Romania (Societat de Students Romontschs)  
**Herausgeber:** Romania (Societat de Students Romontschs)  
**Band:** 35 (1949)

**Artikel:** La restauraziun della claustra de Mustér e Casper Decurtins  
**Autor:** Camathias, Fidel / Fry, Carli  
**DOI:** <https://doi.org/10.5169/seals-881533>

### **Nutzungsbedingungen**

Die ETH-Bibliothek ist die Anbieterin der digitalisierten Zeitschriften auf E-Periodica. Sie besitzt keine Urheberrechte an den Zeitschriften und ist nicht verantwortlich für deren Inhalte. Die Rechte liegen in der Regel bei den Herausgebern beziehungsweise den externen Rechteinhabern. Das Veröffentlichen von Bildern in Print- und Online-Publikationen sowie auf Social Media-Kanälen oder Webseiten ist nur mit vorheriger Genehmigung der Rechteinhaber erlaubt. [Mehr erfahren](#)

### **Conditions d'utilisation**

L'ETH Library est le fournisseur des revues numérisées. Elle ne détient aucun droit d'auteur sur les revues et n'est pas responsable de leur contenu. En règle générale, les droits sont détenus par les éditeurs ou les détenteurs de droits externes. La reproduction d'images dans des publications imprimées ou en ligne ainsi que sur des canaux de médias sociaux ou des sites web n'est autorisée qu'avec l'accord préalable des détenteurs des droits. [En savoir plus](#)

### **Terms of use**

The ETH Library is the provider of the digitised journals. It does not own any copyrights to the journals and is not responsible for their content. The rights usually lie with the publishers or the external rights holders. Publishing images in print and online publications, as well as on social media channels or websites, is only permitted with the prior consent of the rights holders. [Find out more](#)

**Download PDF:** 02.04.2026

**ETH-Bibliothek Zürich, E-Periodica, <https://www.e-periodica.ch>**

# **La restauraziun della claustra de Mustér e Caspar Decurtins\*)**

Da Sur Carli Fry. Per rom. da Sur Fidel Camathias

**Emprema part**

**Las emprovas de restauraziun avon l'intervenziun dil Caspar**

## **1. Disgrazias e miserias**

La veglia e venerabla claustra de Mustér, che dueva tenor Montalembert sanctificar gia la fontauna dil Rein, ha traversau el decuors dils tschentanners vargai differentas gadas temps burasclus, temps de smanatschas ed attaccas, destrucziun e ruinas. Strusch fuva la claustra benedictina de sogn Ursicin erigida sur la fossa de sogn Sigisbert e de siu discipel s. Placi, che las roschas rabiadas dils Saracens han devastau ella cumpletamein. Revegnida da quella sgarscheivla frida, scomian igl avat Martin Winkler ed aunc treis de ses conventuals igl onn 1576 cardientscha e passan ellas rietschas dils de priedi. La casa de sogn Sigisbert steva puspei osum il precipezi de sia existenza. Mo era per quella gada ei l'abbazia retica de Mustér serestabilida.

Per la tiarza gada batta Mustér sin veta e mort per sia existenza ils onns fatals e brutals della revoluziun franzosa, che ha dau la frida mortala a tontas claustras flurentas digl Occident. L' uiara dils Franzos ha derasau miseria, sgarschur e do-

---

\* Questa lavur sebase entiramein sin fontaunas, il bia ineditas. Cunquei che nus publichein denton enzanua auter il text tudestg cun tut la documentaziun necessaria, abstrahein nus cheu de tuttas notas.

lur per tut la Cadi ed ei era sederschida sco ina lavina encunter ils mirs falometers e smulai della Casa de s. Placi. Gia dil temps digl avat Columban Sozzi steva la claustra finanziamein en schliats calzers, essend ch'igl avat capeva in bien ton meglier la scienza e politica ch'ina sauna economia. Cun la sperdita dils beins en Valtellina piarda la claustra en in dai in'entrada annuala de tschienmelli renschs. Plinavon vivan amitg ed inimitg duront il temps dell' uiera franzosa sin sias costas. Truppas franzosas, austriacas e russas s'ignivan egl emperneivel quartier claustral e vivan leu dil bi e dil bein magliond preit e paglia. Mo il pir dil pir suonda aunc cun il di sgarscheivel dils 6 de matg 1799, nua che la claustra cun aunc diesch de ses edificis vegnan arsentai. Il convent vegn spatitschaus en tuttas direcziuns, per onns ed onns mai seveser pli. Bein han las claustras de Fischingen e d' Ottobeuren dau albiert hospital als giuvens fraters, mo quei spatitschem ei buca staus d' avantatg pil spért monastic e claustral. Era muncava il bien tgamun dominant alla famiglia claustrala per quei temps de pitgiras ed arsiras. Ins ha fatg tut il pusseivel per reconstruir la fundaziun de sogn Sigisbert. Las collectas d' ordeifer ein denton stadas pintgas e magras. Per consequenza ei la claustra stada necessitada de vender ina possessiun suenter l' altra, che muntava ina fatala smesada dil patrimoni de sogn Sigisbert.

Strusch in miez tschentaner pli tard, ils 28 d' october 1846, intschendra il fiug danovamein la claustra cun sias duas tuors, il chor della baselgia de s. Martin, igl altar grond ed il teschamber cun siu inventari entir ed entratg. Il donn caschunau munta cerca tschienmelli renschs. Quei incendi disgraziau tucca la claustra sco in cametg da tschiel serein e meina ella cun pass rapidis alla dissoluziun, malgrad ch' ils paders havevan ual passentaun buns exerchezis spirituals sut l' egida d' in pader gesuit. Bein sedostan ins da capo della frida mortala. Il cumin della Cadi empermetta de gidar a reconstruir la claustra ed ins elegia pei a pei in comite per quei intent. Con serius che quei agid fuv denton manegiaus, demuossa la declaronza ufficala dil mistral Arpagaus de Sumvitg, publicada ella «Gasetta Romontscha.» Leu communichescha el cuortamein ch' il Cumin della Cadi


metti cun consentiment dil Convent la claustra sut sia ugadia ed administraziun. Monsignor avat ha denton sfurzau el de revocar quella pretensiun ed il Corpus Catholicum ha silsunter cassau l' administraziun usurpada della claustra. Mo Arpagaus, in nevs dil decan claustral, publichescha en ina gassetta de Cuera la tschontscha derasada per tut la tiara, ch' in conventual de Mustér hagi dau fiug la claustra, e la «Neue Zürcher Zeitung» copiescha prontamein la nauscha tuna.

La situaziun fuva veramein de sesfar e sedesperar. Era la Congregaziun benedictina svizzera sa buca gidar. Igl avat ded Engelberg tegn schizun Mustér per piars. La cancelleria episcopala de Cuera rapporta cuort suenter il berschament, che dus paders, denter quels igl intschendrader inculpau, hagian proponiu als frars Latour la dissoluziun de lur claustra. Luis Latour ha acceptau la proposiziun ed empalau ella vinavon. Ual per quella via fuva la claustra de Faveras vegnida liquidada cuort avon. El vitg Mustér semiava beinenqual magnat d' ina partiziun dils beins claustrals ell' umbriva d' ina casa de narradira.

Per cletg furiavan da gliez temps buca stempraus culturals el Grischun. Il stat catscha ad interim buc il nas ell' affera, malgrad che schizun il «Corpus Catholicum» ei dell' opiniun, che sulettamein quel havessi la competenza d' ina ugadia, per cass ch' ina tala fussi necessaria. Aschia ha igl avat maun liber e nus sesmarvegliain de sia curascha ed energia per reconstruir la claustra. Avat Anselm Quinter fa immediat suenter il berschament in contract cun in impressari de Cuera. Quel duei tenor cunvegnientscha reconstruir igl edifices claustral enteifer nov onns, ferton che la claustra indemnisescha el persunter cun la summa annuala de 30 550 renchs. Gia igl avrel 1847 dat ins l' entschatta allas lavurs de reconstrucziun. La baselgia gronda claustrala havev' ins denton gia cuvretg provisoricamein la fin de schaner cun in tetgal d' aissas. Per cuvierer igl ulteriur edifices claustral han ins silsunter pinau nuninterruttamein lenna els uauls claustrals. Tochen la fin digl onn muntavan ils cuosts de construcziun gia 51 000 renchs, la fin de schaner 1849 schizun 96 840 francs svizzers, senza quintar il material furnius

dalla claustra. Malgrad quei havev' ins strusch entschiet cun la renovaziun interna, ed ei muncava aunc ils clutgers, ils zenns, l'ura baselgia ed igl altar principal. Per curclar ils cuosts d'erecziun ei la claustra stada necessitada de far empristar d'ners, pertgei che las schi beinvegnidas contribuziuns dil Papa, della Propaganda e dils regiments svizzers ell' Italia fuvan de pintga peisa. Dellas collectas prevedidas ella Lumbardia e Sardegna fuva ei de sefidar pauc. Aunc mender fuva ei, ch' ils cantuns catolics savevan ensumma buca gidar, essend engraviai avunda cun las contribuziuns d' uiara per la terrada della ligia separatista, e che la claustra de Nossadunnaun fuva senza sposada malamein dalla schuldada a dunsena e dallas contribuziuns d' uiara. Pader Martin Andreoli, il medem ch' ins aveva suspectau per intschendrader, fa in viadi per collectar ell' Austria, vegn denton citaus a Vienna avon dertgira militara per ault tradiment e spediis a casa plein zanur e cun mauns vits.

Cun ils deivets crescha era la decadenza della disciplina interna en claustra. Serimmond enzaconts paders alla fin d' october 1848 danovamein el Convent, sesprova igl avat d' exequir pli rigurusamein las reglas monasticas. El stueva far quei gia per buca dar memia bia triev allas tschontschas e lamentaschuns, che fagevan la curella per la tiara entuorn. Mo ei va pli tgunsch de reformar ina instituziun externamein ch' internamein. Igl avat fuva memia fleivels per ina reforma radicala, e las relaziuns eran zun difficilas. Las lamentaschuns dils conventuals vulan buca ceder ed il disuorden pren surmaun pli e pli. Aunc 1857 fuva la clausura aviarta igl entir di. Cuzun ils paders de Mustér, Augustin Schuoler e Martin Andreoli, igl «enfant terrible» de quella paupra epoca, s' empatschavan in quex della clausura. Fuvan ei buca a viseta zanua el vitg, sche carmalavan els amitgs e parents en claustra. Era moralmein secunteneva enqual conventual buca dil meglier. Buccas nauschas savevan d' historias scandalusas, e pli lunsch che quellas tschontschas sederasavan e pli fetg ch' ellas carschevan.



Vitg e claustra de Mustér, entuorn: 1840

## 2. Ina nav senza guvernagl batta per la veta

Alla sventira exteriura che smaccava la claustra ed allas prigulusas difficultads internas s' affiliescha aunc la damonda della scola cantonala. La fusiun dellas duas scolas confessionalas en ina scola paritetica, repetidamein empruada el decuors dils onns suenter il berschament, periclitescha la claustra en sias finanzas e schizun en sia existenza. Igl ei perquei buca de ses-marvegliar, sch' igl avat Quinter supplichescha Nossadunnaun en plaids commuentonts per agid e visitaziun. Aschia scriva el ils 8 de december 1854 agl avat: «Cun larmas giu per la fatscha roghel jeu instantamein Vossa Grazia d' haver commiseraziun de nossa casa aschi disgraziada . . . schiglioc ei nossa existenza periclitada grondamein.»

Mo cun supplicas persulas spindravan ins buca la claustra. Cun caschun della visitaziun digl avat de Nossadunnaun, anno 1855, giavischan plirs conventuals il pader gesuit Depuoz per decan e superiur enstagl digl avat Quinter. Ils paders de Nossadunnaun, sesents a Mustér per far scola, voteschan unanimamein per Depuoz, mo il superiur de quel consenta buc alla supplica dil visitatur.

Ils 5 de fevrer 1858 miera avat Anselm Quinter. Ei fageva bunamein la pareta, ch' Anselm Quinter savessi esser il davos avat de Mustér. Cuort avon sia mort vegn il Collegi episcopal a Sviz fundaus, periclitond danovamein la scola claustrala, ch' era eregida suenter la fusiun dellas duas scolas confessionalas cantonales a Cuera. La sperdita della scola cantonala catolica smasa zun fetg il renum e la reputaziun dell' abbazia egl entir contuorn e lunsch entuorn, ed ins entscheiva a temer generalmein per sia existenza.

La mort digl avat saveva denton era dar ina buna viulta. Strusch fuva la fossa digl avat Anselm curclada, che las persunas competentas della vischnaunca de Mustér e dil Cumin della Cadi sevolvan agl avat Hendri de Nossadunnaun per agid e spindrament della casa de sogn Placi, beinsavend ch' igl avat de Nossadunnaun hagi sco visitatur ed administratur apostolic della claustra de Mustér in zun impurtont plaid el capetel. Il re-

datur della «Gasetta Romontscha», professor Placi Condrau, che ha pil futur ina gronda rolla ella restauraziun della claustra, supplichescha il visitatur de tarmetter in conventual de Nossadunnaun per avat a Mustér. La restauraziun seigi zun urgenta, pertgei ch' ei seigi de spetgar ella proxima sessiun dil Cussegl Grond ina nauscha attacca enviars la claustra e quei tonpli, sch' ins stetti ussa culs mauns en sac. Cunzun certas cronicas scandalusas savessien haver paupras consequenzas, vegnend ellas ad ureglia. Avat Hendri pretenda sin quei da professor Condrau in pareri della situaziun finanziaria della claustra, essend che quella seigi d' impurtonza per ina restauraziun ed elezziun d' in niev avat. Condrau calculescha per la claustra ina activa de 300 000 francs, senza quintar ils baghetgs claustrals, e propona d' amortisar ils deivets tras la vendita d' entgins beins e tras affitar ils ulteriurs a condiziuns pli favoreivlas. Danovamein insista Condrau d' exequir ladinamein la restauraziun. Ei setracti la finala buca mo dils conventuals actuals, mobein dils interess digl entir pievel catolic.

Cun ils 20 de zercladur 1858 communichescha igl uffeci circuitual della Cadi agl avat de Nossadunnaun, ch' ils superiors claustrals hagian vuliu far in clom ufficial de quens. Quei savessi denton haver schliatas consequenzas per la claustra. La publicitad savessi prender quei per ina declaraziun de factica insolvenza; sche tuts crediturs havessien ded annunziar lur pretensiuns il medem mument, massi la claustra scussiun. En quei mument vegnessien era las instanzas cantonalas a s' interessar della causa ed a secularisar la claustra. Dr. Augustin Condrau, che haveva suttascet, sco substitut dil Mistral G. G. Condrau, il messadi agl avat de Nossadunnaun, conferma en ina brev cumpignonta, che la claustra de Mustér mondi cun pass gigantes encunter il precipezi d' ina catastrofa finanziaria e morala. Sia sligiaziun seigi nunevitabla, per cass ch' ins prendi buca immediat mesiras radicalas. Mo in superiur capavel e serius possi spindrar ella. Cun quei ch' in tal seigi buca d' anflar denter ils conventuals de Mustér, sche stoppien ins encurir in ordeifer. Ils cussegliers governativs Toggenburg e Peterelli seigien della medema idea. Las autoritads grischunas vegnien a far nuot per

spindrar la claustra. Ellas patratgien denton era buca de far ira a frusta ella.

«Ils amitgs della dissoluziun ein secapescha encunter tutta intervenziun, pertgei ch' els ein pertscharts d'arrivar bia pli spert a lur intent cun schar ruclar la caussa sco ella sa e po.»

Mistral G. G. Condrau supplichescha igl avat de Nossadunnaun en in rapport da Cuera anora, cuort suenter la davosa sessida dil Cussegl Grond, de presentar la damonda della claustra de Mustér als avats della Congregaziun benedictina svizzera ed era al nunzi ed al vicari general de Cuera, ch' eran seradunai a Nossadunnaun. La Surselva entira ed entratga spetgi cun ardimment in' acziun en favur de sia claustra. Ins hagi mai giavischau ina dissoluziun, anzi, ins seigi schizun pronts de far tut pusseivel per spindrar la claustra. Scadin targlinem seigi denton de donn. Mo vesamein seigi ei reussiu a Condrau de far quescher enzaconts commembers protestants dil Cussegl Grond appartenend la claustra. Fetschien ins denton nuot en caussa, lu seigi de temer grondamein per ella. Sballuni denton Mustér, sche vegnien era las ulteriuras claustras grischunas a curdar. Il Mistral intimescha allura igl avat, de cun agid dils numnai prelat «dar a quella situaziun scandalusa ina direcziun al bien e legreivel.» Plinavon fa el responsablas las autoritads ecclesiasticas per tut las consequenzas, che neschien pervia dil targlinem e s'entardem.

Avat Hendri haveva denton giu pretendiu in inventari exact della facultad claustrala dal Mistral cass, Dr. Augustin Condrau, sco risposta a sia brev dils 20/22 de zercladur. Ina survista dils debiturs e crediturs della claustra seigi absolutamein indispensabla e munti perquei aunc buca in clom uffical de quens. La lubientscha de Roma per ina elecziun d' in avat dependi grondamein d' ina clara exposiziun della situaziun finanziaria. Igl avat sappi buca secuntentar pli ditg mo cun empruems de buna fei. La bilanza, ch' il decan claustral pader Baseli Carigiet tarmetta ladinamein, s' accordava cun quella de Placi Condrau tochen ad ina piccolezza. Ils schischoms havevan ils dus commissaris guvernativs Toggenburg e Steinhauser giu valetau. Era supplichescha il decan plinavon en sia brev aschuntada de

stuschar aschi fetg sco pusseivel alla elecziun digl avat. Avat Hendri empeila immediat igl inventari al nunzi a Lucern e sustegn fermamein la supplica de Mustér.

Deplorablamein vegn ei fatg nuot decisiv, schegie che las relaziuns economicas fuvan buca schi trittas e havessen tuttavia tunschiu per la restauraziun della casa de Diu, sco quei semuossa pli tard. Igl ei stau fatal per Mustér, che la nunziatura haveva dapi l'entschatta tochen alla sligiazion pauc interess per la damonda claustrala, gie ella ha schizun fatg senschignadas malprudentas, leu nua ch'ella ei s'occupada della damonda.

Las contractivas pervia dell'elecziun digl avat vegnan strattgas videneu denter Mustér e Nossadunnaun e denter Nossadunnaun e Lucern. Il plenipotenziari papal Bovieri fuva d'accord cun l'elecziun d'in avat, mo per fatschentas pli impurtontas dueva il niev avat esser dependents dal visitatur. El pretendeva era, ch' ils conventuals de Mustér sesents en posts ordeifer astgien buca far deivets per donn e cuost della claustra. Gie, il visitatur pretendeva schizun, che la surdada della claustra entira ed entratga cun tut ses dretgs e beins ad ina outra claustra seigi la megliera sligiazion. Cun quei che quella via seigi denton buca pusseivla e practicabla, sche dueigi il papa sez numnar igl avat ord ils treis candidats presentai dal Convent claustral. Ils deivets stoppien denton vegnir liquidai avon l'elecziun digl avat cun daners recaltgai della vendita de beins. Il success dellas contractivas fatgas entochen ussa pervia dell'elecziun digl avat ei staus quel, che la Sontga Sedia ha refretg la nomina per in temps nundeterminau.

Secapescha che l'abbazia ed ils amitgs della restauraziun ella Cadi han buca saviu secuntentar cun quella decisiun. Gia avon la comunicaziun de quella sevolva pader Anselm Caplazi de Mustér al visitatur cun in clom d'agid desperau: «La claustra ei in bastiment senza guvernagl el stemprau. Gie, il bastiment ei gia scarpaus en duas parts e las auas devastontas penetreschan neuaden da forza e smanatschan de sfundrar il bastiment surcargaus dils deivets. Nus navigaturs, sposai da tristezza, lavur e dolur clamein a tshiel ed a ti . . . : subvenite nobis, per Deum Omnipotentem, perimus!»

Pader decan Carigiet fava il pli fetg permalaus, ch' ins haveva refiers l' elecziun digl avat. Per quei fa el en sia brev dils 26 de fenadur la smanatscha d' abdicar sco decan. Ed el fa da ditschiert. Ils 10 d' october 1858 communichescha el a Nossadunnaun, ch' el convocheschi il capetel pils 21 dil meins. Essend ch' el sappi nunpusseivel secuntentar cun la disposiziun existenta «omnia maneat ut sunt», sesluitada neuaden el vestgiu innocent d' in tschut, remetti el siu uffeci per quei di. Quella brev ualti massiva sesprova de perschuer il visitatur dallas consequenzas, che savessien nescher per la claustra entras refierer l' elecziun digl avat. Il sogn uffeci e l' oraziun quotidiana seigien per stenscher mintga mument. L' economia administreschien mauns dormulents. Ei seigi negin che paghi ils deivets, negin che fetschi turnar en claustra ils paders sesents ordeifer. Ei fussi d' entscheiver la scola, mo ei maunchi las forzas necessarias leutier.

### 3. Landrechter Dr. Augustin Condrau vul fullar ina via

En quei interval va Dr. Augustin Condrau sez a Nossadunnaun per contrahar en caussa. Tenor sia opiniun ei l' amortisaziun dils deivets aunc adina la condiziun la pli urgenta per ina restauraziun. El propona per quei motiv la vendita dils beins situai ordeifer la vischnaunca de Mustér. Sco tochen dacheu sappi ei buca ir vinavon, pertgei che dapi 1852 hagi l' administraziun puspei fatg in deficit de 10 000 francs. Turnaus da Nossadunnaun, serenda Condrau en claustra per stimular il Convent de tarmetter ina delegaziun tier il visitatur per plidentar cun el personalmein l' entira damonda. Il decan, che haveva denton, sco già remarcau, dau sia demissiun al visitatur, sedosta primarmein da forza encunter quella insinuaziun. Mo per finir concluda il Convent tuttina unanimamein de rugar Nossadunnaun danovamein ed instantamein per agid. Per quei intent tarmetta il capetel il decan, pader Baseli Carigiet, ed igl econom della claustra, pader Gregori Capeder, a Nossadunnaun. Quel era staus ditg sesents leu, suenter il berschament. Quella delegaziun survegn

la consigna de descriver la situaziun della claustra, che fuva entochen culiez els deivets, senza avat e buc el cass d'ademplir il sogn uffeci ed il survetsch divin nundir la scola. Ella duei per quei proponer ina pli speditiva elecziun digl avat, ni silmeins contonscher las plenipotenzas necessarias per il capetel e per ils paders. Nossadunnaun va cumpleinamein d'accord culs dus petents. Il visitatur empeila a Ruma la supplica per ina presta elecziun d'in avat e conceda al capetel ed a ses dignitaris tuts ils dretgs, che seigien buca reservai alla Sontga Sedia. En quei interval duei il capetel far propostas concisas per l'amortisaziun dils deivets (170 000 francs), che vegnien lu immediat transmessa a Ruma.

Pér ils 13 de november tractescha il capetel claustral la vendita dils beins. El concluda de vender la cuort claustrala a Trun, il bein Rentsch, l'acla de Barcuns, l'alp Lumpegna per la valeta de 100 000 francs, l'alp Nadels (17 000 francs) e la fravia a Disla (2 500 francs). Plinavon vul el incassar la summa de 25 000 francs pils tscheins perpetens ed ulteriurs d'havers ella valeta de 20 000 francs. Ils ulteriurs beins aunc restonts han de vegnir affitai.

In pugn de vesta empau pli agen demuossa pader Martin Andreoli. Essend ch'el ha buca saviu ni vuliu far part dil capetel dils 13 de november, presenta el en ina brev da Rumein sia opiniun al capetel per mauns dil visitatur. La claustra seigi tenor siu pareri aunc de spindrar finanzialmein, denton sulettamein entras ovras energicas e buca mo cun planisems e parlahems. La vendita dils beins biala e persula garanteschi mai e pli mai la sanaziun della claustra. Cun spedir ils conventuals en outras claustras sminueschien ins bein ils cuosts pil viver, ils deivets denton buc. Igl agid della Congregaziun ni della Sontga Sedia seigi e resti in van desideri. Per finir dat il sribent della brev ina tucca als superiors, remarcond ch'ils deivets seigien naschi, per quei ch'els hagien capiu ni uffeci ni dignitad e seigien mai stai dai persunter. Fagend illusiun alla procedura observada tochen ussa, particularmein dalla nunziatura, che la claustra hagi igl emprem de viver en relaziuns regularas, avon ch'ins astgi patertgar d'ina elecziun d'in avat, remarca pader Martin

en ina certa malignadad: « La claustra drova nuota esser già ordavon stgisa de dar dunsena cumadeivla e buna ad in avat; igl avat duei anzi esser cheu per mantener la claustra.»

Las supplicas dil Convent de Mustér e dil visitatur per la concessiun d' in avat alla claustra bandunada vegnan exaudidas a Ruma pli spertamein, che quei ch' ins carteva, malgrad l' opiniun dil pader de Rumein. Il cardinal della Genga, prefect della Congregaziun papala dils uestgs, communicescha per ils 6 de fevrer 1859 al plenipotenziari a Lucern, ch'il papa hagi concediu l' elecziun digl avat.

Obtenend igl avat Hendri la plenipotenza per l' installaziun d' in superiur a Mustér, secrei el de slijar la crisa il meglier cun tarmetter in de ses paders per avat en la claustra retica. Sia egliada tucca pader Gieri Ulber, in Grischun romontsch, aschia che sia nomina fuva segiramein ventireivla. Papa Pius ils IX conferma per ton ils 15 de fenadur 1859 il candidat dil visitatur sco avat.

#### **4. Il guvern grischun s' occupa della claustra en sguardin**

En quei interval ei la regenza grischuna denton tuttina s' empitschada della damonda claustrala. Quei havevan ins già daditg temiu. Il davos stausch per quella acziun dat la vendita della cuort claustrala a Trun. La primavera 1859 haveva Dr. Augustin Condrau anflau il cumprader della «Cuort» ella persona de Gion Giachen Cavegn de Dardin, che haveva fatg fortuna a Madrid. Quella vendita allarmescha la publicitad, pertgei ch' ei settractava della respectabla summa de 90 000 francs. Quei fuva bia per las relaziuns de gliez temps.

La commissiun preparatoria dil Cussegl Grond ha silmeins giu tonta creanza de spetgar la posiziun dil «Corpus Catholicum» avon che sedecider definitivamein. Quel tractescha la damonda all' entschatta della sessiun primavauna dil Cussegl Grond, en la sesida dils 18 de zercladur. Il president, Luis Latour, descriuva la situaziun sco suonda: «La vendita della Cuort vala per in segn, che las relaziuns finanzialas della claustra ein ualti sgur-

dinadas. Medemamein plaida era il factum, che la casa de Diu posseda pli ch' in onn buc avat. La claustra de Nossadunnaun, incaricada da Ruma cun l' administraziun de Mustér, dubitescha senza della pussevcladad d' ina restauraziun.» Ella discussiun propona cusseglier Peterelli, ch' il «Corpus Catholicum» dueigi intercurir ensemen cun la commissiun cantonala «egl interess della claustra e dil pievel grischun catolic» las relaziuns finanzialas e disciplinaras della claustra. Plinavon seigi d' eruir, schebein la facultad claustrala seigi sesminuida ni carschida dapi igl inventari d' anno 1852, e per tgei intent, ch' ins hagi impundiu la summa recaltgada della vendita della «Cuort» a Trun. Il resultat dell' inquisiziun duei vegnir rapportaus enteifer in onn al «Corpus Catholicum» cun las propostas correspondentas. Quei conclus stoppi vegnir communicaus al Cussegl Grond. La minoritad vesa medemamein la necessitad d' ina intervenziun, mo pretenda ch' il «Corpus Catholicum» sappi sil pli far proposiziuns al Cussegl Grond, mo mai decider sez definitivamein ella damonda claustrala. Quella proposta della minoritad vegn buca acceptada. Persuenter vegn la proposiziun Peterelli aunc cumplettada entras l' annexa, ch' ei vegni fatg immediat ils pass necessaris, per cass che l' inquisiziun pretendi.

Quella proposiziun vegn presentada ils 22 de zercladur da Luis Latour al Cussegl Grond. Il Cussegl Grond tractescha la damonda denter ina deliberaziun pervia d' ina alzada dellas premias pils catschadurs e l' elecziun della commissiun finanziaria pigl onn administrativ 1859. Ei arrivavan alla conclusiun, ch' il cussegl hagi la competenza de survegliar l' administraziun claustrala e ch' ei seigi era ner basegns d' examinar manedlamein las relaziuns finanziaaras dell' abbazia. La proposta dil «Corpus Catholicum» vegn acceptada e concludida en quei senn, ch' il Cussegl Pign e la commissiun cantonala vegnien incompensai cun l' inquisiziun della situaziun ed administraziun della facultad claustrala enstagl dil «Corpus Catholicum». Ella proxima sessiun dil Cussegl Grond duei vegnir dau plaid e fatg dil resultat dell' inquisiziun e fatg las proposiziuns necessarias. Per cass, che la facultad claustrala vegnessi periclitada en quei interval a moda e maniera zun extraordinaria, sche seigi il Cussegl Pign

autorisau de prevegnir provisoricamein a quei prighel cun ils pli adattai. El stoppi denton la proxima sessiun informar il Cussegl Grond de ses pass fatgs.

## 5. Contractivas denter la nunziatura e la regenza

Remarcablamein dat ual la brev dils 3 de settember dil plenipotenziari papal a Lucern alla regenza l'ocasiun de far igl emprem pass all'execuziun de quei conclus. Bovieri descriva al Cussegl Pign la claustra en ina cumpletta decadenza spirtala ed economica. Probabel dueva quei maletg aschi stgir argumentar sia supplica d'approbar il niev avat de Mustér. A quei pass de Bovieri reagescha la regenza cun ina brev dils 12 de settember a decan e Convent de Mustér. Il Cussegl Pign communichescha alla claustra il conclus dils 22 de zercladur prius dal Cussegl Grond. En medem temps fa el menziun della brev dil nunzi dils 3 de settember e dat allura d'entelgir, ch'el considereschi scadin retard della procedura per in prighel serius en disfavour dell'existenza economica della claustra. Ils superiors vegnan fatgs responsabels ed admoni de tralaschar pil mument tuttas disposiziuns della facultad claustrala. Era tuts contracts d'impurtonza vegnan scumandai ed ei vegn pretendiu de far ladinamein in inventari cumplet e detagliau de tuttas activas e passivas per mauns dil Cussegl Pign. Las midadas eventualas dapi 1852 ston surtut vegnir indicadas e motivadas.

Plinavon pretenda la regenza in rapport della situaziun dil benefeci de Rumein sco era sur dils deivets, ch'ils paders d'ordeifer hagien fatg el decuors dils davos quendis onns per donn e cuost della claustra. Finalmein pretenda el copias dils contracts della vendita della «Cuort claustrala» e dellas affitaziuns dils beins claustrals. Latour, che haveva suttascret la brev, rispunda alla brev de Bovieri dils 3 de settember cun ina sia dils 17 de settember per talian. Mustér sesanfli senza dubi en ina cumpletta decadenza finanziaria. La cuolpa de quella ruina economica seigien tenor sia opiniun primarmein ils paders d'ordei-

fer, e buca ils conventuals, che seigien vivi ils davos onns aschi spargnusamein e semplamein. Da l' autra vart hagien ils aschi numnai amitgs e parents della claustra ord la proxima vischinonza consumau dapi onns sia facultad de tala maniera, ch' ins sappi generalmein mo sesmarvegliar. In megliurament seigi strusch de spetgar, num ch' ei vegni introduciu ina administraziun semplia, spargnusa ed independenta, survegliada dallas autoritads cantonalas. La reforma interna stoppi denton vegnir realisada dallas instanzas ecclesiasticas. Latour ei perschadius, che la claustra sappi quell' uisa vegnir spindrada. El fussi schizun cuntents, sche l' entira damonda savessi vegnir liquidada en buna entelgientscha cun il nunzi. Il meglier per quei intent seigi forsa ina conferenza personala cun la persuna de pader Teodosi Florentini, il mediatour il pli acceptabel ed adattau per discussionar ina gada quei problem.

Bovieri ei fetg resalvaus en quellas contractivas. Ins senta en tut e dapertut, ch' el sesprova de permalar negin e cunzun buca la regenza. Tarmettend il Convent claustral ad el la brev citada dils 12 de settember cun la supplica per directives, empeila el semplamein la brev agl avat de Nossadunnaun. Pér l' entschatta d' october communicescha il Cussegl Pign al decan e Convent e silsunter era a Bovieri il conclus schi impurtont, che scamonda al Convent la recepziun de religius buca grischuns per il proxim temps. Bovieri s' informescha posteriuramein de quei schenau en ina brev dils quendis d' october sur della situaziun dellas contractivas e communicescha en medem temps alla regenza la nomina digl avat Gieri Ulber, confirmaus a Ruma per Mustér. El supplichescha la regenza de s' expectorar appartenent quella nomina. Il Cussegl Pign declara en sia risposta dils 24 d' october de buca saver corrispunder a quella supplica, entochen che la commissiun cantonala hagi buca tractau la damonda. El seigi denton pronts de recumandar la renconuschientscha digl avat alla commissiun cantonala e de sustener e proteger quel en tuttas sias stentas per l' impurtonta restauraziun. L' emprima condiziun e premissa persunter seigi denton, ch' il nunzi secunvegna cun las instanzas cantonalas sur dils mieds e la procedura per ina restauraziun generala della claustra. In dils em-

prems mieds seigi bein ina conferenza dils delegai de tuttas parts. La brev dil Cussegl Pign concluda plein creanza: «Possia Excellenza finalmein esser pertscharta della intenziun zun sincera della regenza, che sesprova d'arrivar en pasch e concordia vicendeivla ad ina buna sligiazion della damonda claustrala.»

Ils representants dil Cussegl Pign e dil nunzi arrivavan veramein gia il november ad ina cunvegnientscha arisguard la restauraziun della claustra de Mustér. La cunvegnientscha preveda primarmein pertened la restauraziun economica della claustra ina inventarisaziun dell'entira facultad. Ils paders d'ordeifer astgien buca far deivets pil futur per donn e cuost della claustra. Plinavon stoppien ils deivets claustrals vegnir scuntrai ton sco pusseivel cun ils capitals existents, cunzun cun liquidar ils schi numnai tscheins perpetens. La disposiziun ulteriura della economia agricola duei vegnir resalvada alla secunvegnientscha reciproca dellas parts. Suenter la sanaziun della facultad claustrala sappi igl avat era puspei sorprender l'administraziun economica della claustra, respectond secapescha era pil futur ils principis citai cheu sura. La regenza resalva denton il dretg de controllar da tuts temps la contabilitad della claustra e siu menaschi finanziar. En caussas religiusas e disciplinaras posseda igl avat mintgamai la direcziun e decisiun assoluta. La claustra eregia ina scola reala per mattatschs e mantegn cun agens mieds silmeins treis scolasts per quella. La scola seigi suttamessa, sco scadin ulteriur institut cantonal, alla surveglionza e direcziun dil departement d'educaziun cantonal. Denton admetti il Cussegl Pign era conventuals jasters sco magisters. Tenor il plan della regenza stoppi il nunzi dar siu consentiment a quella cunvegnientscha, ferton che la regenza vegli recumandar quella cauza al consentiment dil Cussegl Grond.

Quella cunvegnientscha vegn discussionada ils 18 de november a Pfäffikon en ina conferenza denter Bovieri, pader Teodosi Florentini (representant della regenza?) ed igl avat de Nosadunnaun.

Pér ussa, ils 28 de november, communichescha Bovieri al Convent de Mustér, ch' il papa hagi numnau avat pader Gieri Ulber. Tut che pareva finalmein madir ad ina buna sligiazium.

## 6. In plan de restauraziun d' avat Hendri de Nossadunnaun

Cheu presenta avat Hendri de Nossadunnaun il december 1859 in agen plan per la restauraziun, che duei vegnir fatga entras in superiur d' ordeifer. Las proposiziuns dil visitatur muntan «sias davosas propositas». Ellas termineschan era facticamein las contractivas, denton a moda e maniera nunspetgada. Il project digl avat risguarda en contrast cun quel della regenza era las relaziuns dell' abbazia de Mustér cun il Cumin e cun la Congregaziun svizzera benedictina. La regenza surpren tenor il plan dil visitatur la regulada totala della facultad claustrala. Per quei intent nominescha ella cun consentiment dil niev avat in liquidatur versau ni era in contabilist. Quel ei incumpensaus de relaschar in clom de quens general per la claustra, de scuntrar tonsco pusseivel ils deivets claustrals existents e de rugalar la contabilitad commensuradamein. Ellas propositas digl avat Hendri cattein nus per l' emprema gada l' intenziun de schar curdar la scola reala claustrala existenta, respectivamein de silmeins translocar quella ordeifer la claustra. Quei ei stau in pass de grevas consequenzas, in pass che las instanzas cantonalas savevan mo beneventar. Pli tard, all' occasiun della restauraziun claustrala, ei quei patratg era vegnius exequius — temporalmein silmeins — e quei lu aunc malgrad la protesta e las resalvas dellas instanzas circuitalas dil cumin. Il project ei denton — per cletg e ventira, ughegein nus de remarcar — buca secomprovaus e pli tard vegnius annullaus practicamein.

Las instanzas cantonalas, circuitalas e communalas d' inavart e la claustra de Mustér cun siu visitatur, la Congregaziun benedictina svizzera ed il nunzi da l' altra vart, eran pia sil precint de liquidar la damonda claustrala, e quei en buna pasch e concordia e tenor las propositas presentadas dagl avat Hendri. Cheu succeda a moda e maniera sorprendenta in «coup de théa-

tre», in culp teatral. Il plenipotenziari papal, Bovieri, refusescha las propostas dil visitatur, argumentond ch' ellas mondien buca sufficientamein a prau cun las normas canonicas. Silsuenter s' occupescha el sez della sligiazion della damonda ed exequescha quella de tala maniera, che la restauraziun, quasi reussida, resta sin rucca aunc per dus ulteriurs decennis.

Aschia va igl onn 1859 alla fin, senza ch' ei fussi reussiu la minima caussa per la restauraziun, schegie ch' el haveva entschiet aschi bein e pleins de speronzas, per la claustra. Pader Martin Andreoli selamenta pruamein en ina brev da Rumein ad in plevon buca numnau — per motivs interns sa ei settractar mo dil plevon de Mustér, pader Placi Tenner — ch' ils superiurs hagien disdiu cumplettamein, luvrond, sapientivamein ni nunsapientivamein per la ruina della claustra. El crei, ch' ins hagi cun quei contrahem cun la regenza dau ad ella in pretext per crear impediments. Nossadunnaun havessi stuiiu tarmetter tenor sia opiniun in avat «cun energia, forza e dignitad», fussi quei lu stau pader Gieri Ulber ni in auter. Mo aschia havessien ei saviu demussar lur carezia fraterna. Vegli Nossadunnaun gidar, lu stoppien ei agir e buca mo contractar. Pader Martin sefida talmein de sia persuna, ch' el crei perfin, daus il mument, de contonscher il consentiment della regenza a quellas acziuns. Il scribent della brev ei cunzun permalaus ch' ins stoppi endriescher «a populo barbaro» (dal sempel pievel) certas condiziuns tschentadas da pader Ulber, ferton ch' ils conventuals astgien endriescher nuot. Dapi biabein dus meins seigien ins ius ella damonda claustrala per tontas e tontas vias puleinas, che la venerabla casa de Diu stoppi sballunar tenor plan . . . Mo lu bettien ins en mintga cass la cuolpa a dies alla regenza.

La brev dil pader malizius e rampinus plaida in lungatg dictaus dal nauschaspért de rebelliun encunter ses superiurs ecclesiastics. Cert, era nus constatein, ch' ils superiurs procedan senza plan e senza energia sufficienta. Havess ins pegliau frestgamein cantun da gliez temps, sco quei che Decurtins ha agiu 20 onns pli tard, ins havess saviu evitar ils artechels claustrals fatals e disgraziai d' anno 1861, pertgei che da gliez temps leu eis ei buca de snegar, che la regenza era beinvulenta alla clau-

stra. Mo pader Martin emblida de confessar sia atgna cuolpa dellas relaziuns claustralas zun stgiras, tonpli ch' el capescha oreifer de zuppentar e sulerar sias finamiras ualti stgiras cun plaids patetics e loms sco ina pischada. Raschun haveva el en quei grau, ch' el preveda aunc ina brava spirada de temps, avon ch' ei vegni facticamein gidau sia claustra.

## 7. La decisiun guvernamentala dils 22 de december 1859

Suenter che las contractivas denter las autoritads ecclesiasticas e statalas havevan fritgau nuot, fa la regenza cun ils 22 de december ina publicaziun el feagl ufficial dil Grischun, che se-basa sil conclus dils 22 de zercladur prius dal Cussegl Grond. Quella ei signada dal president guvernativ Luis Latour e secloma sco suonda:

«1. Igl ei scumandau alla claustra de Mustér, ton al Convent entir sco als singuls paders, seigien ei lu sesents en claustra ni ordeifer, de far deivets per donn e cuost della claustra. Medemamein eis ei scumandau als sura numnai de disponer dils davers ed auters dretgs e privilegis ni de vender ni d'impegnar schischoms senza la lubientscha dil Cussegl Pign.

2. Consequentamein vegnan tals deivets e tuttas venditas ed hipotecas, fatgas senza il consentiment della regenza, annulladas, ed in e scadin admonius de sepertgirar de talas fatschentas cun la claustra, ni cun in de ses conventuals.»

Malgrad che quellas ordinaziuns seclamavan en favur della claustra, sche setractava ei tuttina d' ina usurpaziun principiala de ses dretgs, per dir la verdad d' ina ugadia. Quella saveva denton tgunschamein muntar l'entschatta della fin, tonpli ch' era quella nova publicaziun prevedeva in conclus dil Cussegl Grond. Dapi ils 22 de zercladur 1859 smanatschava ina bova alla casa de sogn Placi, e quei act unilateral della pussonza statala, commessa en contradicziun cun la finamira intenzionada en las contractivas, ha danovamein sluccau il terren smulus e prigulus.

Ils ulteriurs pass dil stadi suondan ladinamein. Cuort sissu elegia il Cussegl Pign ils dus signurs cusseglier guvernativ Tog-

genburg e Dr. med. Christian Decurtins, bab dil Caspar, per «liquidatur» della claustra e dat ad els culs 31 de mars 1860 las instrucziuns necessarias.

### 8. Intervenziun dígl uffeci circuítal della Cadi

Las contractivas nunfritgeivlas fuvan era vegnidadas remarcadas dals cercchels, che s'interessavan per la restauraziun. Aschia cartevan las autoritads dil Cumin «de violar lur engirament pretaus solemnamein», sch'ellas fetschien buca tut lur pusseivel per prevegnir alla catastrofa finala, en quella situaziun critica dell'abbazia, che munti u restauraziun ni dissoluziun.

Perquei sevolv'ígl uffeci de Cumin l'entschatta de fevrer cun ina brev particulara agl avat de Nossadunnaun, al nunzi ed al Cussegl Pign, supplicond de far tut il pusseivel per il spindrament della claustra. Il Cussegl Pign sincerescha en sia risposta dils 11./13. de fevrer, ch'el seigi adina sespruaus en las contractivas cun las autoritads ecclesiasticas de realisar la restauraziun della claustra de Mustér. Il success dellas autoritads statalas denton dependi dalla collaboraziun dils conventuals de Mustér e dellas autoritads ecclesiasticas. Il Cussegl Pign vegni era pil futur a colaborar cun quellas istanzas aschi lunsch sco siu uffeci lubeschi. El supplicheschi dil reminent las autoritads circuítalas de tralasar tuts pass ulteriurs allas istanzas ecclesiasticas, per che las relaziuns s'embruglien buca aunc pir.

Ígl avat Hendri obtegn ils 10 de fevrer aunc ina brev particulara dal Mistral G. G. Condrau. Condrau affirma, che la vischnaunca de Mustér ed il Cumin entir vegnien a promover da tutta forza la restauraziun della claustra. El supplichescha instantamein ígl avat, de prender ladinamein las disposiziuns necessarias. Quei stoppi denton vegnir realisau ton sco pusseivel aunc el decuors de quei meins, avon che la commissiun cantonala seraduneschi per tractar la damonda.

La risposta de Nossadunnaun sto esser stada consternenta per las autoritads dil Cumin. Ígl avat declara en plaids ualti cuorts e schetgs, ch'el hagi fatg tut siu pusseivel per Mustér,

malgrad «nera malengrazieivladad e suspects vergognus». Cun ils conclus ils pli novs della regenza e cun auters eveniments seigi denton la damonda arrivada ad in stadium, ch' el sappi buca s' occupar pli della caussa directamein. Sco el hagi dil reminent intervegni, duessi il nunzi haver fatg novs pass en favur della claustra.


### **9. Disposiziuns disgraziadas dil plenipotenziau papal Bovieri**

Mo quellas machinaziuns dil nunzi fuvan ordvart adattadas per far sbullanar la claustra definitivamein. Il visitatur era buca mo informaus della refusada de sias propostas per ina secunvenientscha en la damonda claustrala, anzi, el enconuscheva senza dubi gia ussa las intenziuns de Bovieri cun Mustér. Ils 21 de mars, gest per la fiasta de s. Benedetg, communicescha Bovieri al Convent de Mustér, che l'elecziun de pader Gieri Ulber per avat seigi annullada, essend che Roma hagi refusau las condiziuns fatgas. En medem temps intimescha el al Convent de proponer treis candidats per ina elecziun abbaziala, ord quels vegni il papa silsuenter a numnar igl avat. Gia cun ils 24 de mars fa Mustér ladinamein sias elecziuns. L'elecziun croda unanimamein per pader Placi Tenner.

Ei fuva pia empalau tut alla buna via. Ins astga bein far la damonda, pertgei ch' ins hagi atgnamein spetgau aschi ditg per dar in avat a Mustér, essend ch' ins ha la fin finala tuttina vuliu eleger el dal gremi dils conventuals.

Mo cheu succeda veramein enzatgei nunspetgau e nunsemiau. Per ils 31 de mars portan las duas gasettas grischunas, «Il Grischun» e la «Nova Gasetta Romontscha», la nuviala sensazionale, che Ruma hagi numnau pader Martin Andreoli per administratur claustral. Quella nuviala savevan oravontut ils indigens buca capir e cumprender.

Mo aschi curios ch' ei pareva, ei fuva la vera verdad. Bovieri arriva ils 12 d' avrel a Mustér. Gia pil di suandont communicescha el al Convent seradunau en preschientscha de siu auditori, che pader Placi Tenner seigi numnaus superiur e pader



La claustra de Mustér avon il berschament de 1846

Martin Andreoli administratur subordinaus al superiur. Per motiv de quella installaziun abdichescha igl avat Hendri de Nossadunnaun sco visitatur per Mustér. El declara cun ina notizia de siu agen maun, aschunschida alla fin de sias «davosas propostas» tontas gadas remagliadas, sco suonda: «Il suttascret renunzia a siu uffeci de visitatur apostolic per Mustér, essend ch' il plenipotenziari papal . . . della sontga Congregaziun pil stan monastic ha declarau che sulettamein il disfamau pader Martin Andreoli, che ha adina tenu el pil narr, possi aunc spindrar la claustra. Il plenipotenziari ha era veramein numnau quei pader administratur della claustra cun pussonza cumpleina, malgrad ch' il Convent e las autoritads ecclesiasticas e civilas han protestau detschartamein. Tuts ils plans per ina restauraziun ein ussa per quei motiv discavegliai e destrui cumplettamein.»

Quella palpada schi disgraziada de Bovieri fuss stada sufficienta per ruinar la claustra totalmein. Dadas quellas relaziuns astgan ins bunamein dir de cletg, che la regenza fuva prevegnyda al manischem e turschem d' Andreoli cun il decret dils 22 de december e cun la nomina dils dus «liquidaturs» per la claustra exequida ils 31 de mars.

#### **10. La restauraziun avon il Cussegl Grond anno 1860**

Las autoritads ecclesiasticas havevan disdiu cumplettamein, per dir la verdad cun creanza. Igl ei perquei de sesmarvegliar grondamein, che las tractaziuns della damonda claustrala el Cussegl Grond, nua ch' ellas tenor conclus digl onn passau stuevan vegnir discussionadas, han buca giu consequenzas aunc pli tragicas per l' abbazia de Mustér.

L' autoritad suprema dil Cantun tractescha la damonda claustrala en sia sesida dils sis de zercladur 1860. La regenza informescha il Cussegl Grond de ses pass fatgs entochen dacheu (clom uffical de quens e la nomina dils dus «liquidaturs») e survarga dil rest buca las propostas della commissiun cantonala. Quella haveva giu tractau la restauraziun claustrala ils 12 de

mars. Essend ch' ils rapports dils «liquidaturs» muncavan aunc, fuva ella s' abstenida de prender ina decisiun definitiva ed haveva concludiu, a vesta dils merets della claustra, de spetgar il decuors dil svilup della restauraziun. Era il Cussegl Grond pren quei pugn de vesta. Luis Latour exprima ella discussiun suandonta opiniun: «Ina restauraziun spirtala, morala e disciplinara della claustra ei absolutamein necessaria. La claustra duei denton anflar la via adattada de sias atgnas forzas e cun agid dellas autoritads ecclesiasticas, mo senza che las instanzas officialas dil stat stoppien semischedar. Dess Mustér denton buca posseder pil futur las pusseivladads e la forza per ina veta ed activitad fritgeivla, lu ei ina dissoluziun de preferir al squetsch indirect d' ina recepziun restringida dils novizs, che sminuescha mo la stema dil pievel per la claustra e lubescha a quella suletta-mein in pauper vegetem empei d' ina existenza flurenta.» Il Cussegl Grond approbescha en quei senn las mesiras pridadas dalla regenza e dalla commissiun cantonala. En medem temps incarichescha el las duas instanzas de studiar e plidentar era pil futur cul Convent e cullas autoritads ecclesiasticas la damonda della restauraziun e de rapportar il success al proxim Cussegl Grond.

Ins astgà bein caracterisar il proceder dil Cussegl Grond en quella sessiun per grondamein moderaus. Mo alla fin della sesida senuspescha il Cussegl tuttina buca de remarcar, ch' el vegni a prender tuttias mesiras e precauziuns necessarias, per cass ch' ins arrivi buc a proposiziuns cuntenteivlas per la restauraziun futura della claustra, e ch' el vegni allura era a ponderar la damonda della dissoluziun della claustra.

Il Convent claustral rispunda a quella smanatscha entras in memorial dils 7 de zercladur, che protesta encunter «las mesiras e precauziuns necessarias» e surtut encunter la recepziun restringida de novizs ed encunter ina privaziun della claustra de sia administraziun economica. Quella protesta vegn prelegida alla sessiun dil Cussegl Grond dils 8 de zercladur, mo messa d' in maun, essend ch' il Cussegl Grond aveva buca priu conclus definitiv il 6 de zercladur.

Cun quella posiziun haveva il Cussegl Grond danovamein fatg attenta la claustra della bova periclitonta, mo haveva aunc reteniu quella pil mument. La claustra e las autoritads ecclesiasticas fuvan admonidas e savevan ussa pir che mai, ch' ei havevan de s' occupar seriusamein della restauraziun, vulevan ellas prevegnir alla dissoluziun.

Tgei cuora e passa ussa facticamein? Pader Placi Tenner, ch' era sco gl' ei enconuscent a nus, vegnius numnaus superiur, ed haveva schizun obteniu las pontificalias senza esser vegnius benedius, damonda igl avat de Nossadunaun gia avon che la claustra obtegni dalla regenza la comunicaziun ufficala dils conclus pri dal Cussegl Grond cun ina brev dils 23 de zercladur, co la claustra dueigi secuntener en quella nova situaziun. Igl avat deplorescha il conclus dil Cussegl Grond ed animescha dil reminent il superiur de mantener la disciplina claustrala, che negin sappi reproschar zatgei ad el. Aschia obtegni el forsa era pli spert novizs, che sappien silsunter vegnir scolai ed instrui a Nossadunnaun.

### **11. Aluis Latour, en num della regenza, enquera ina via ord ils malpass**

Il Cussegl Pign eis ei perquei, che pren l' iniziativa. Ins sto veramein saver bien grau ad el, ch' el insista de far enzatgei, pertgei che sch' el havess intenzionau ina dissoluziun maligna della claustra, lu havess el mo saviu selegrar della inactivitad della cuntra part. Cun ina brev dils 28 de fenadur alla claustra de Mustér sereferescha el danovamein a sia comunicaziun dils 10 dil meins. La regenza remarca, che la claustra hagi empermess en sia brev dils 26 de fenadur sia promptadad cumpleina, de collaborar alla restauraziun, mo hagi buca indicau ils mieds e las mesiras d' ina tala. L' elaboraziun de propostas positivas seigi denton indispensabla, per ch' il Cussegl Grond seigi cuntentaus. Quella canun seigi l' existenza futura della claustra segiramein periclitada. Ils superiurs dell' abbazia vegnan envidai de compa-

rer allas nov della damaun dils 13 d' uost ella casa governativa per discussionar la situaziun della claustra.

Alla conferenza dil di fixau sediscuoran pader Placi Tenner en num della claustra e Luis de Latour per la regenza sur della restauraziun. Latour presenta ils sequents puncts de discussiun: L' administraziun claustrala, la recepziun dils novizs, la disciplina interna e la scola. El punctuescha plinavon, ch' il Cussegl Pign sesprovi d' arrivar ad ina entelgientscha communabla e restrenschi sias pretensiuns mo al pli necessari. La regenza (probablamein inspirada dagl amitg della scola Latour) metti la pli gronda peisa sin la scola reala. Ella pretendi in excellent scolast alla testa della scola e dasperas aunc dus ulteriurs scolasts. L' elecziun de quels treis hagi de vegnir resalvada al cussegl d' educaziun, e la scola sco tala stoppi vegnir suttamessa, sco scadina autra, alla survegilonza e direcziun suprema dil departement d' educaziun. Quei munti denton buca l' exclusiun dils conventuals dalla scola. Ils cuosts annuals della claustra comportien 3000.— frs. Latour declara, che la regenza vegni a prender ton risguard sco pusseivel dell' administraziun e della recepziun dils novizs e surschar la disciplina interna cumpleinamein alla claustra, per cass che quella corrispundi al giavisch della regenza en fatgs de scola.

Tenner, che fuva evidentamein buc in diplomat, refusescha energicamein quellas pretensiuns. El vul ensumma gnanc discussionar in tal compromiss, era buca sut resalva d' ina ratificaziun dil Convent. El accepta medemamein buca l' ulteriura proposta de Latour, che la claustra dueigi dar ina contribuziun annuala allas scolas communalas per risguardar silmeins aschia sias obligaziuns enviars il Cumin della Cadi.

Nus capin cumpleinamein, ch' il superieur de Mustér ei serendus cun grev cor a quella radunonza. Ins haveva aunc buc emblidau ella Cadi, ed aunc meins en claustra, tut quei ch' ils Latours havevan fatg encunter la scola catolica claustrala. Ins temeiva e supposeva intents tschelai davos quei bi ed interessant giug dil menader incontestau dils catolics liberals dil Girschun, plans che survargavan la strategia dil bien e sincer Pader

Placi, ina gada ch' el entrava en compromiss. Ultra de quei se-tractava ei d' ina caussa de bia memia gronda munta.

Nus capin denton era che la regenza saveva, dadas las rela-ziuns actualas, buca dar absolut criedi alla declaronza de Tenner che la claustra vegni sezza a sespruar d' introducir ina admini-straziun regulara ed era d' ademplir pil futur, sco tochen da cheu, tenor meglier saver e puder, las obligaziuns della scola enviers il Cumin della Cadi. Nunvulend P. Placi far las minimas concessiuns, secunvegnan ei de presentar il protocol cullas pro-postas de Latour al Convent per decisiun. La discussiun defini-tiva vegn refretga ad ina proxima conferenza, tenuta el decuors dil meins tenor invitaziun e fixaziun dil Cussegl Pign.

Igl uestg de Cuera, al qual pader Placi presenta il resultat della conferenza, considerescha la damonda della scola per ina damonda vitala della claustra, che stoppi vegnir sligiada en ina moda cuntenteivla per la regenza. El surdat a pader Placi, ch' era sil precint de viagiar a Nossadunnaun, ina brev, supplicond igl avat per paders e gidonters per la scola. Mo aschia sappi la claustra vegnir spindrada. Sch' ei vegni buca agiu enteifer quei onn en favur della restauraziun, lu seig' ei senza fallir de spe-tgar dal proxim Cussegl Grond la dissoluziun della claustra.

Era a Nossadunnaun vegn ins ad haver fatg attents pader Placi de siu secuntener ed agir empau malprudent. Quella ga reagescha Pader Placi spert. Gia ils 11 de settember reussescha ei ad el ina conferenza a Cuera. Sper el cattein nus aunc igl eco-nom pader Martin Andreoli, sco representant della claustra, per la regenza cantonale sco adina Luis Latour e per il Cumin della Cadi il mistral regent G. G. Condrau ed il mistral cass Dr. Cri-stian Decurtins. A quella conferenza ein ins sfurzaus de laschar d' ina vart las tractandas dell' economia claustrala e della re-cepziun de novizs, essend che pader Placi declara detscharta-mein che sia cunscienza lubeschi buc ad el de far concessiuns de num en quels dus puncts. Persuenter arrivan ins el pugn della scola al resultat suandont:

1. La claustra de Mustér s' oblighescha de pagar allas scolas communalas dil Cumin della Cadi, excepzionau Schlans, ina con-

tribuziun de frs. 1800. Quella summa ei mintgamai de pagar allas autoritads circuitalas e sto vegnir repartida allas 6 vischnauncas pertenantas tenor il diember de habitonts per la salarisaziun dils scolasts. Ei vegn denton remarcau expressivamein, che quella contribuziun stoppi vegnir aschuntada alla paga dils scolasts.

2. Il Cumin della Cadi renunziescha perencunter ad ina scola gimnasiala, che la claustra de Mustér fuss tenor la secunvegnientscha de 1846 obligada de mantener. Ultra de quei ha la claustra l'obligaziun d' ereger e mantener era pil futur ina bein endrizzata scola tudestg-romontscha.

La cunvegnientscha resta in toc pupi de pintga muntada. Igl avat Hendri de Nossadunnaun, che pader Placi Tenner informescha della conferenza, declara de buca saver approbar tut tale e quale. Per spindrar la casa de Diu duei ins denton corrispunder ton sco pusseivel als giavischs della regenza. Mustér tarmetta la risposta digl avat a Cuera. La regenza pren enconuschientscha della «pintga bunaveglia» de Nossadunnaun e betta tutta responsablidad per las consequenzas naschentas a dies alla claustra de Mustér. Dil reminent ei la cunvegnientscha della conferenza de Cuera vegnida annullada dalla commissiun cantonala cun 8 encunter 5 vuschs.

Davos la regenza e davos la commissiun cantonala sesanflava e sezuppava la persuna dirigente de Luis Latour, che fuva, forsa buca senza raschun, empau malcuntents e permalaus dil resultat dellas contractivas. Per incumbensa dil «Corpus Catholicum» tarmetta el perquei cun ina brev dils 16 d' october agl avat de Nossadunnaun il conclus dil Cussegl Grond dils 6 de zercladur, prius en fatgs della claustra de Mustér. A quella aschunscha el aunc ils protocols dellas duas conferenzas dils 13 d' uost e dils 11 de settember. El deplorescha frontschamein ch' il superieur della claustra de Mustér seigi senuspius della tractanda dell' economia claustrala e della recepziun de novizs. Tractond els la damonda della scola hagi el, Latour, era proponiu al superieur de liquidar quels dus puncts definitivamein. Mo aschia seigi l' existenza della casa de s. Placi segirada. Ussa seigi nunevitabel, che l' entira damonda della claustra vegni tractada e discus-

sionada el Cussegl Grond e quei schizun aunc en sia formulaziun originala. En mintga cass sappien ins buca far responsabels el per las consequenzas smanatschontas. Bein sincerescha igl avat de Nossadunnaun cun sia risposta dils 25 d'october a Latour, che Nossadunnaun vegni a gidar ils candidats religius de Mustér ual ton sco ils ses. Mo quella brev concilionta quietescha buca la malcontentientscha de Latour.

Cuntut, ins steva alla fin digl onn 1860, senza ch' ins hagi prestau enzatgei positiv e fritgeivel per la restauraziun gia daditg urgentamein necessaria. Gie, la steila de Mustér pareva schizun de svanir, essend che las conferenzas sgartiadas culla regenza e la malaveglia dil zun pussent Latour havevan aunc lavagau enstagl gidau la situaziun.

## 12. Pader Teodosi Florentini vegn en agid

Igl onn sequent empermetta nuot meglier. All' entschatta de fevrer 1861 communicescha pader Placi Tenner, che haveva giu acceptau da siu temps siu uffeci mo per motiv, che Bovieri haveva smanatschau el cun suspensiun, al visitatur avat Hendri sia resignaziun de superieur. El motivescha sia demissiun cun il factum, che las difficultads exteriuras s'emplunien e ch' el possi nundir a quellas gnanc dar damogn allas difficultads internas. La davosa minuta, avon che sia demissiun obtegni valur giuridica, sedecida pader Placi tuttina aunc ad in pass prudent e raschuneivel. Strusch ch' el ha giu tarmess sia demissiun a Nossadunnaun, arriva pader Teodosi Florentini en claustra. Versaus ch' el fuva dil mund e de fatschentas cusseglia el al Convent de sevolver per agid agl uestg. Tuts ils paders fuvan cuntents de quella proposta. Ils nov conventuals de Mustér supplicheschan perquei cun ina petiziun dils 10 de fevrer 1861, suttascreta da tuts entras agen maun, igl uestg de Cuera de s' occupar cun consentiment dil visitatur della restauraziun della claustra, pertgei che tuttas emprovas hagian entochen ussa buca giu success. Quella petiziun ei daventada zun impurtonta, gie forsa decisiva

per l' existenza della claustra. Ella finescha ina gada cun la fama circulonta, ch' entgins dils paders giavischien sez la dissoluziun della claustra. Il factum, che tuts conventuals hagien giavischau senza excepziun la restauraziun della casa de s. Placi, ei staus pli tard ual ella discussiun dil Cussegl Grond d' impurtonza decisiva.

Igl uestg Clau Florentini piarda buca in mument temps. Gia per la fin dil meins sevolva el a Ruma e descriva la situaziun de Mustér. Las relaziuns a Mustér ein tenor sia descripziun veramein deplorablas. Il Cussegl Grond ha giu dau alla claustra in termin ded in onn per dar ina entschatta alla restauraziun. Enteifer ils 8 emprems meins hagi ins bein pagau deivets ed eregiu ina scola reala per la Cadi. Era la direcziun ed administraziun della casa seigien vegnidas midadas. Mo ils 9 conventuals vegnien buca perina in cun l' auter. Igl administratur, installaus dalla nunziatura, seigi beinvesius ni en claustra ni ordeifer, ed ei secatti denter ils conventuals buc in soli sulet, che savessi surprender igl uffeci de superiur. Perfin umens zun beinvulents e cuntents seigien perquei perschua, ch' ina dissoluziun della claustra fussi de preferir allas relaziuns actualas.

Facticamein eis ei de temer, che la claustra vegni dissolvida dal Cussegl Grond alla proxima sessiun dil meins de zercladur. Per quei motiv han il «Corpus Catholicum», las autoritads circuitalas ed il clerus supplicau instantamein igl uestg de far tut siu pusseivel per il spindrament della claustra. Era ils religius sez han declarau a pader Teodosi, all' occasiun d' ina viseta en claustra, ch' ei giavischien igl uestg per visitatur. Igl uestg enumerescha tuts ils merets della casa de s. Placi e sincerescha al Papa, che tuts ils catolics deplorassien zun fetg la dissoluziun dell' abbazia. Per finir communicescha igl uestg sia promptadad de gidar, sche Ruma concedi ad el las plenipotenzas necessarias, essend che Mustér seigi exemts digl uestgiu.

Pader Teodosi, che fuva probabel igl iniziand ed autur dil plan ded empalar la restauraziun della claustra els mauns digl uestg, tarmetta la petiziun episcopala per invista a Nossadunnaun e supplichescha igl avat per sia approbaziun e recumanda-

ziun. Finfatg, igl avat Hendri scriva sez per igl emprem de mars a Sia Sontgadam il Papa, supplicond de suttametter, tenor la petiziun digl uestg dils 26 de fevrer, la claustra de Mustér totalmein ni parzialmein agl uestgiu e de conceder agl uestg tut las facultads necessarias per la restauraziun. Quei pass extraordinari seigi schizun la suletta pusseivladad de spindrar la claustra, demai che tuttas emprovas seigien buca reussidas. Plinavon seccatti igl uestg pli maneivel de Mustér ed astgi plitost sperar igl agid dallas autoritads statalas. Daus il cass, che l'abbazia vegnessi dissolvida, sche pudess ins plitost spindrar silmeins ina part dils beins claustrals per la Baselgia. Tuts ils conventuals de Mustér seigien recurri comunablamein agl uestg, sco quei document aschuntau demuossi. La claustra de Mustér hagi dil reminent gia apparteniu ina gada pli baul als uestgs de Cuera e de Brixen.

La decisiun sco tala, schebein ils novs pass della Curia episcopala vegnien ad haver success ni buc, stueva denton buca vegnir prida en emprema lingia a Ruma, mobein en la tiara sezza.

Ins spetgava veramein cun ardiment e malpazienza la sessiun primavauna dil Cussegl Grond. Il niev Cussegl Grond fuvu commissionaus dagl anteriur de s'occupar danovamein cun la damonda claustrala. Ei era de spetgar il pir dil pir. Ins sepreparava da domisduas varts per la decisiun.

D' in maun cattein nus en quels dis critics oravontut pader Teodosi Florentini, che sedrova inschignusamein per il spindrament della claustra. El descriva en ina brev agl avat de Nosadunnaun la situaziun actuala e dat sco proxima finamira della defensiun la parola: En scadin cass stuein nus impedir, ch'ei vegni decidu enzatgei definitiv en la damonda claustrala. Per quei motiv basegna ei ina procedura energica e segira. La scola sto oravontut vegnir spindrada e pader Martin Andreoli allontanau. Ei fuss schizun fetg d'avantatg, sch'igl avat commissionass igl uestg d'agir en siu num per esser segiraus da tuttas varts.

Il capetel grond sursilvan fa, senza dubi intimaus da Florentini, ina petiziun al nunzi de surdar la direcziun della clau-

stra agl uestg e d' allontanar igl administratur ual installau, pader Martin Andreoli.

La regenza damonda per ils 16 d' avrel igl ordinariat episcopal, tgei che seigi vegniu fatg dapi anno 1860 per la restauraziun de Mustér e tgei proposiziuns ch' ins seigi stgìs de far pil futur per spindrar Mustér.

Igl ordinariat motivescha en sia risposta l' installaziun d' in niev superiur entras Ruma, la fundaziun della scola e la cuntenteivla situaziun economica dell' abbazia. Las propostas per il proceder futur secloman: Installaziun d' in superiur energic, la pusseivladad de saver translocar conventuals renitents, facilitar la recepziun de novizs e subordinaziun della claustra agl uestg.

### 13. Il Cumin dils 5 de matg 1861

Quei fuva la situaziun per il di de cumin dils 5 de matg. Quel dueva dar decisiuns zun impurtontas per la damonda claustrala. La dieta historica ha cuzzau biabein tschun uras. Ina certa tensiun percuora las retschas dils 1 300 umens seradunai, il mument ch' il superiur della fundaziun de s. Placi, pader Placi Tenner, entra cun il til tradizional en il curtin-cumin. Da tuttas fatschas e da tuttas egliadas san ins leger la damonda anguschusa: «Tgi sa, sch' igl ei bein aschia, ch' il representant della claustra de s. Placi plaيدا oz per la davosa gada avon il pievel?» Prendend pader Placi sco usitau il plaid, havess ins bein udiu a curdond in feagl dellas plontas en curtin-cumin. El descriva cun ina vusch migeivla mo bein capeivla — ins haveva eregiu quei onn per l' emprema gada ina tribuna per igl oratur, bein per accentuar la maiestad ed impurtonza de quei mument — la situaziun della casa de Diu, alla quala ins hagi concediu avon in onn in temps d' improva. «Situada denter tema e speranza, smaccada dalla peisa smanatschonta della dissoluziun, semeglia la claustra in malfitschent, ch' ei truaus alla mort e che spera tonaton aunc grazia ed amnestia.» Igl oratur sa buca

crer, ch' il pievel catolic vegni a sbittar la casa de Diu, ch' el hagi defendiu dapi tschentanners sco la poppa de ses egls. El sa buca crer, ch' il pievel possi sblundergiar las pintgas vanzadiras della fundaziun dils sogns patruns della tiara. Co giudicass ins ils affons, che bettessen dad esch ora ina mumma depauperisada? La claustra ei la mumma, che ha vegliau sco vera protectura gia alla tgina della libertad . . . Schi ditg sco il pievel ha aunc talien per religiun e giustia sa el mai e pli mai cuir alla claustra ina tala sort . . . Ins renfatscha alla claustra, ch' ella prestuot pli, ella seigi ussa veglia e caducca, e nezegi era nuot pli, seigi danvons . . . Lein metter il cass, che quei fuss propri ver, astg' ins better on via in pauper malsaun ed invalid? Mo quei ei ensumma buca ver!» Pader Placi regorda ses Retoromans dils immens merets della claustra tochen il temps il pli recent. Era suenter il temps aschi terribel dils Franzos, che hagi stuschau la claustra orasum il precipezi, hagi ella surviu al pievel entras pastoraziun, educaziun ed agid pils paupers. Mo ina plonta, che seigi privada della vivonda e destruida dalla garniala possi buca purtar fretg abundant gia enteifer in cuort onn d' emprova. La claustra hagi basegns de temps per serecuvrar. Ella vegni denton segiramein a flurir e verdegar cun la benedicziun e voluntad celestiale, entras igl agid dil clerus e la beinvuglientscha dellas autoritads statalas e cunzun entras il susteniment ed agid dil pievel. Per finir engrazia igl oratur al Cumin per sia beinvuglientscha demussada tochen quei di e supplichescha era el futur per sia protecziun, cunzun pigl agid de quels signurs, ch' il pievel vegni ad eleger oz al Cussegl Grond.

Pader Placi era in cusarin dil renomau catschadur sursilvan Pieder Tenner, che ha fatg catscha passionada sin camutschs ed uors. Oriunds d' Acletta, ina fracziun della vischnaunca de Mustér, ha el pastorau biars onns sco plevon zun amau las olmas de sia vischnaunca nativa, ed el valeva per in um popular e zun preferiu. Il plaïd magistral, che fuva pesaus e patergtaus plaïd per plaïd cun il cor tremblont dil superieur schi popular, ha veramein commuentau ils cors dils umens della Cadi.

Buca mo las dunnauns, che miravan la tschentada dal mir dil curtin-cumin, era biars dils umens havevan las larmas, che ruclavan giu per gaultas rubigliadas, concludend igl oratur siu plaid.

Cheu seglia Luis Latour silla buora. Gia da giuvens onns era el vegnius elegius cusseglier guvernativ e cusseglier nazional. Plinavon fageva el part della commissiun cantonala e dil cussegl d'educaziun. Latour fuva veramein la persuna decisiva en la regenza, cunzun per caussas d'interess catolics. En la Cadi mava la steila dils Latours denton da rendiu. El fuva car-teivlamein vegnius a cumin sulettamein sco observatur. Cun agens egls vuleva el observar il pievel e sia posiziun enviers la restauraziun. Essend ch' el vegn proponius per derschader, anfla el la buna caschun per saver plidar al pievel. Refusond la tscherna fatga per el, tacca el immediat la damonda claustrala. Oravontut po el buca seretener de far endament sia pussonza al pievel della Cadi, nua che la steila de sia famiglia mava da rendiu. El lai schizun percorscher clar e bein, ch' il spindrament della claustra dependi da sia persuna. Il pievel respira tut levgiaus declarond el, bein empau sfurzaus ed impressio-naus dal plaid de Tenner e dall' opiniun generala dils umens, de vuler luvrar per l' existenza della claustra, per cass che quella secuntegni endretg.

Tgei muntavan quels plaids aschi significonts digl um rufinau della politica?

Plein preschientscha de spért senezegia Dr. Aug. Condrau della situaziun. Cun in votum cuort ed objectiv, che corrispunde-va a sia tempra personala, propona el de pegliar Latour pil plaid e d' eleger quel al Cussegl Grond, per ch' el sappi pia luvrar ed agir leu per l' existenza della claustra. La proposta Condrau ei stada ina strategia mulada e rufinada d' emprema classa. Quella ha valiu ton sco ina battaglia gudignada per l' existenza dell' ab-bazia. Plinavon propona Condrau al cumin de concluder ina pe-tiziun al Cussegl Grond ed agl uestg en favur della restauraziun. Domisduas propostas vegnan acceptadas unanimamein.

#### 14. Ils famus artechels cantonals dil onn 1861

Las instanzas circuitalas dil Cumin della Cadi exequeschan pia la cunzina dil pievel e fan cun ils 22 de matg la petiziun concludida al Cussegl Grond. L' autoritad suprema de nies cantun discussionescha la damonda claustrala per ils 8 de zercladur 1861. Quella sligia quei problem, suenter haver prelegiu las decisiuns officialas dil onn passau ed ils acts arrivai en quei temps, suandond las proposiziuns della commissiun cantonala dils 27 de matg sco suonda: Il Cussegl Pign tschenta in ugau per la claustra, che ha de survegliar l' administraziun e de render onn per onn plaid e fatg de quella alla regenza ed al «Corpus Catholicum». La claustra astga buca far contracts de cumpra e de scomia d' ina certa impurtonza senza approbaziun della regenza. Il Cussegl Pign surveglia la conservaziun della rauba claustrala, che astga per neginas circumstanzias vegnir sminuida. Als conventuals sesents ordeifer eis ei scumandau strictamein de far deivets per donn e cuost della claustra.

Quellas mesiras, giuridicamein ualti dubiusas e contestablas, fuvan, priu tut il curriu e passau, silmeins parzialmeins giustificadas. Ellas savevan en mintga cass esser d' avantatg per la claustra e fuvan silmeins parzialmeins vegnidadas approbadas dallas autoritads ecclesiasticas en pliras conferenzas preliminaras.

Zun fatals, gie principialmeins nunacceptabels e concepì directamein encunter il beinstar della casa de Diu, fuvan ils dus emprems alineas dil paragraf quater dell' ordinaziun officiala: «Il vut religius astga buca vegnir fatgs avon ch' il candidat hagi cumplenu il vegnavel onn.»

E «la recepziun de novizs e conventuals buca grischuns ei per ordinari scumandada.»

La pusseivladad, ch' il Cussegl Pign sappi far excepziuns, mitigava buca zatgei de num l' entira ordinaziun de grevas consequenzas. Era las ulteriuras condiziuns engraviavan zun fetg l' entrada en la claustra periclitada. Tenor quellas stueva scadin noviz absolver avon la recepziun igl examen de maturitad (§ 4,4)

e purtar ina dota de silmeins 2250 frs. (§ 5). La survegionza e controlla, schebein la claustra respecti quels paragrafs omis dus ni buc, haveva il Cussegl Pign communablamein cugl ugau, cun il commember catolic della regenza e la part catolica della commissiun cantonala. Quei gremi haveva era la competenza de refusar ni acceptar in candidat, che vegneva en carplina cun quels paragrafs ualti dubius (§ 3 e 6).

Zun significativs fuva era igl artechel final dell' ordinaziun (§ 7), che secloma: «Il Cussegl Pign vegn a constrenscher la claustra de Mustér de satisfar, per aschi ditg sco ella exista, a sias obligaziuns enviars la scola ad ina moda e maniera, che corrispunda allas pretensiuns dil temps ed als basegns dil Cumin della Cadi. Sesprovan ins de contonscher quei intent entras mantener ina scola claustrala, sch' ei quella suttafretga alla controlla, survegionza e direcziun dil departement d' educaziun.»

Cun quei conclus dil Cussegl Grond finescha in capetel della damonda per la restauraziun claustrala. Quei conclus engreviescha, per buca dir annulescha, primarmein la restauraziun. Igl ei gnanc tgisà, che la disposiziun dellas autoritads cantonales enviars la claustra eran malamein pigiuradas dapi in onn.

Anno 1860 havevan ins fatg curdar igl artechel dils novizs cun la remarca expressiva, che la limitaziun della recepziun dils novizs mundi indirectamein ton sco catschar en summa la claustra ellas stretgas, pericliteschi sia existenza, spogli senz' auter l' abbazia della stema generala e lubeschi a quella sil pli de vegetar de quei paupramein.

Supprimend il Cussegl Grond quellaga practicamein la recepziun dils novizs, era el sedecidius per la guillotina freida e zuppada. Il conclus dil Cussegl Grond condannava, considerau da pugn de vesta historic, la claustra plaunsiu alla mort. La proposiziun della minoritad de pil mument buca far midadas essenzialas, entochen che l' administraziun seigi sesviluppada pli favoreivlamein e la damonda della scola sligiada definitivamein, vegn refusada. Sch' ins ha refusau quella proposta entras la mo-

tivaziun, che tut pretendi in' acziun immediata, lu corrispundeva quei exactamein allas relaziuns ed alla situaziun actuala. Quei pugn de vesta savevan schizun ils amitgs della restauraziun acceptar. Mo deplorablamein surveva igl effect practic dellas ordinaziuns dil Cussegl Grond alla dissoluziun e buca al spindrament della claustra. Per la medema via va il Cussegl Grond, refusond cun 29 encunter 28 vuschs la proposiziun della commissiun cantonale de tschentar la claustra sut la giurisdicziun episcopala. Il giavisch e plan de pader Teodosi fuva pia satraus pil mument.

Il niebel giurist, histograf ed um della politica Pieder Conradin de Planta, ch' ins astga giudicar per in dils Grischuns ils pli prominents de quei temps e per la feffa dil parlament grischun, haveva exclamau duront la discussiun adumbatten el parlament: «Vus vuleis bein schar exister era pil futur la claustra, mo vuleis dasperas buca schar ad ella dretgs e tener la spada tratga sur siu tgau — seigies sincers e gests e cui ad ella ina veta empau pli libra, sco quei ch' ei descha a scadina societad per ina veta honoreivla ed undreivla. » Seigi tgei che vegli, ad ina dissoluziun sfurzada e violenta della claustra eran ins tuttina buca arrivaus. Sch' il spért cultural dellas secularisaziuns claustralas, che veva giu fugau avon dus decennis per l' entira Svizera, havess aunc fraviau el Grischun, fuss Mustér senza dubi staus piars, pertgei ch' ins haveva reussiu sulettamein enzaontas emprovas bein manegiadas della restauraziun pretendida avon in onn dal Cussegl Grond e condizionadas per sia futura existenza. Dadas quellas circumstanzias stuevan ins esser cuntents d' haver contonschiu ina caussa: La casa de s. Placi viveva aunc, ed ins haveva silmeins — quella gada schizun senza termin — gudignau temps e peda.


### 15. Avat Paul Birker pren il guvernagl

Mustér haveva pia recaltgau temps per continuar sia via della crusch! Bein numna Papa Pius IX entras in decret dils 5

d' uost 1861 igl uestg de Cuera visitatur apostolic per Mustér cun la plenipotenza d' instituir leu ils superiors sco ei pari e plagi. Igl uestg dat senza targlinar l' entschatta alla restauraziun. Per il pli empren fa el quei, ch' il Convent e las autoritads circuitalas della Cadi havevan daditg spetgau e desiderau. El tschenta Paulus Birker, igl anteriur avat dell' abbazia de s. Paul a Minca, fundada dal retg Duitg II, per avat de Mustér enstagl dil superior pader Placi Tenner, che fuva bein in excellent religius animaus dalla megliera buna veglia, denton buca igl um per restaurar ina claustra decadenta. Pader Placi, che haveva già resignau pli baul per mauns digl avat de Nossadunnaun, ha confirmau alla fin d' october, avon la nova nomina, danovamein sia resignaziun agl uestg de Cuera. Pér la fin de november introducescha il vicari general de Cuera, pader Teodosi Florentini, il niev superior a Mustér.

Igl uestg haveva denton falliu la noda entras quella nomina. Plein entusiassem vegn Birker retscharts a Mustér, pertgei ch' ins spetgava dad el la restauraziun della claustra. Già sia statura imponenta e sia savida renconuschida pretendevan stema e respect da quella persuna. Mo il factum, ch' el haveva disdiu sco avat a Minca leventa dubis d' opportunitad e cunvegnientscha de quella nomina. Ultra de quei fuva avat Birker, sez in um ascetic, d' ina rigurusadad absoluta. Ei muncava agli cumpleinamein il dun de s' accumadar allas relaziuns dadas, che siu spinus uffeci pretendeva absolutamein. Bein ha el empriu il romontsch en aschi cuort temps, ch' ins sa mo smarvegliar. Quei fuva denton tut. Siu dar e sedepurtar entir ed entratg formava in contrast disgraziu cun ils paders pli passai e cun il pievel. Con pauc ch' el capeva il pievel e risguardava ses interess, demuossa il factum, ch' el ha votau 1870 el Cussegl Grond bials e persuls ed en contrast cun ses 4 collegas della Cadi per la dimessa della pasculaziun cumina. Il pievel ha posteriuramein, cun in surpli surpudent, lu era fiers quella dimessa discreditada dal Cussegl Grond.

Essend ch' el capeva nungrazia de s' accumadar allas relaziuns della claustra e dil pievel, sch' empurtava ei era pauc,



Klastra Dissenterien 8 Nov. 1846

La claustra de Mustér, suenter il berschament dils 8 de nov. 1846

ch' avat Birker ha capiu ualti spert de setrer bein cullas autoritads cantonalas e surtut cun Luis Latour, al qual el ha fatg buns survetschs ellas contractivas cun las vischnaucas della Cadi pervia della via dil Cuolm d' Ursera. En mintga cass para ei de quei curios e nunusitau, ch' igl avat plaída, strusch ch' el ei arri-vaus en claustra, allas radunonzas communalas de Mustér e Tujetsch per l' acceptaziun della via, e strusch d' avantatg pils interess economics della claustra, declarond el a quella caschun, che la claustra cedi ses pli bials praus gratuitamein al Cantun per il niev transit della via nova. Il Cussegl Grond elegia el persuerter ella commissiun per la reorganisaziun della scola cantonala. Igl ei tgunsch pusseivel, che la regenza e Latour mettevan certas speronzas dubiusas e discussas en il niev Monsignor de Mustér, che severificheschan denton buc. Na, igl avat destruescha schizun en in dai tuttas illusiuns, s' opponend el anno 1874 curaschusamein e detschartamein el Cussegl Grond alla revisiun della costituziun federala.

La restauraziun della claustra schi desiderada e spetgada pudeva sut direcziun de Birker ni pruir ni prosperar. Anzi, la casa de s. Placi mava, de quei plaunsiu mo cun pass ton pli segirs, alla malura, senza ch' igl avat havess pudiu impedir la minima caussa.

Bein ston ins remarcar, ch' il niev avat, tier siu ingress, ha anflau la claustra en ina situaziun veramein desperada. Strusch ch' il Cussegl Grond haveva giu mess la paupra claustra en cadeinas, schloppa ina nova zun prigulusa vischigia en il tgierp malsanetsch dil pazient. Alla nundisciplina interna ed alla tribulaziun externa s' affiliescha il scandal.

Pader Martin Andreoli sevolva cun dus memorialas, ch' el haveva redeggiu e spediù senza saver e vuler dil Convent, al Cussegl Grond ual sesent. Ei fuva ualti gries, ch' el engraziava aunc al Cussegl Grond per las mesiras pridas enviars Mustér. Aunc pli turpegius fuva denton sia protesta alla proposta della commissiun cantonala de suttametter la claustra agl uestg. Allora giavischa el aunc de quei misteriusamein, che per cass ch' ins havessi de condemnar ils paders de Mustér alla mort, duei-

gien ins schar murir els sco vers republicans. Dau il cass, ch'ins vul ensumma interpretar quella formulaziun empau misteriusa conformamein alla vera significaziun dil plaid, sche stuevan ins capir quei per ina invitaziun alla dissoluziun della claustra.

Cuort temps pli tard, directamein suenter la conclusiun della sessiun primavauna dil Cussegl Grond — Dieus seigi ludaus, ch'ella era concludida — attacca igl administratur Andreoli, ch'enconuscheva apparentamein buca las minimas retenientschas, Dr. Augustin Condrau a moda e maniera nunqualificada ella pressa grischuna. Ei nescha per consequenza denter quels dus signurs ina polemica, che stueva explodir sc' ina bumba. Ils inimitgs della claustra savevan ensumma buca giavischar in meglier congiurau ed alliau; per ses amitgs denton fuva ina tala procedura in tradiment, gie, ina stillettada el dies; per il Cantun entir ed entratg ina sensaziun de schliatas consequenzas. En scadin cass fuva ella absolutamein buc adattada per svegliar el pievel e denter ils signurs simpatia ed agid per la claustra. Il rabiau e rampinus pader Martin va denton entras quella polemica sez a frusta. Pader Placi tgisa el agl avat de Nossadunnaun ed al nunzi. Bein sesprova igl administratur de segiu-stificar a Lucern en scret ed entras la delegaziun de siu amitg e confident, il plevon de Surcasti, Dr. Macolin. Mo adumbatten. Il november vegn el per agen giavisch secularisau da Ruma. Finalmein fuva quei um eliminaus, che haveva giu dau ton de partertgar a sia claustra ed a ses superiors e che fuva staus en tut siu agir in grond impediment per la restauraziun.

Alla fin de november 1861 exequescha la regenza ils conclus dil Cussegl Grond dils 8 de zercladur ed elegia ils signurs, «Bundesstatthalter» Dr. Aug. Condrau e mistral Dr. Cristian Decurtins per ugaus della claustra. Ella commissionescha quels dus signurs d'intercurir la situaziun economica della claustra e de far silsuenter las propostas necessarias per las mesiras, che seigien absolutamein de prender. Il rapport dils 15 d'avrel 1862, daus dals dus ugaus al Cussegl Pign, demuossa che la reorganizaziun finanziara, fatga 1859 dalla claustra, seigi veramein scomprovada favoreivla. La vendita della «Cuort» claustrala hagi

sminuïu considerablamein ils deivets e l' affitaziun della pli gronda part dils beins augmentau treidublamein las entradas. Era la amortisaziun dils tscheins-fier ella Cadi, decretada dal Cussegl Pign hagi giu in success nunspetgau e buca purtau sperditas alla claustra. Ils ugaus proponan la vendita d' entgins ulteriurs beins per l' amortisaziun dils deivets. L' administraziun vegni aschia surveseivla e simplificada, per cass ch' ils beins vegnien alla fin della perioda currenta d' affitaziun puspei dai per tscheins. El decuors dils dus onns 1860/61 haveva la claustra tuttina reduciu ses deivets per biabein 30 000.— frs. Malgrad ch' il quen amministrativ dils dus davos onns figurescha in deficit de passa 4 000 francs, creian ils ugaus, per finir, che l' existenza della claustra seigi economicamein segirada.

D' ina impurtonza extraordinaria per l' existenza futura de Mustér fuva denton la sort de sia scola. Il Cussegl Pign e la commissiun d' educaziun, incaricai cun quei pensum, confereschan el decuors digl onn pliras gadas cun avat Birker e cun igl official episcopal pader Teodosi. Las contractivas dattan denton ell' aua e quei cunzun muort las pretensiuns della regenza ariguard las elecziuns dils scolasts. Perquei presenta la commissiun d' educaziun la damonda della scola en in rapport e proposta dils 30 de matg 1862 al Cussegl Grond. L' ordinaziun publicada dal parlament cantonal tucca sensiblamein ils dretgs della claustra, prescrivend ella buca mo il character e la tempra della scola e fixond ils differents roms d' instrucziun. Anzi ella incarrichescha schizun il cussegl d' educaziun de fixar il plan de scola ed igl uorden disciplinar. Era obtegn quel la competenza d' eleger ils scolasts; denton vegn el restrenschiu d' encurir las forzas necessarias per l' instrucziun primarmein denter ils conventuals, per cass ch' ei secatti leu forzas adequatas. Scolasts jasters astgava el pladir mo cun informaziun anteriura dils superiors claustrals, respectivamein digl ordinariat episcopal. Las ordinaziuns dil Cussegl Grond mavan pli lunsch ch' il cussegl ded educaziun, che haveva aunc viliu conceder als superiors della claustra ni agl uestg il dretg d' in veto per gl' engaschament de scolasts jasters.

Quellas usurpaziuns, l'introducziun dell'ugadia claustrala e la reglementaziun della scola sura citada, succedidas e procedidas igl onn passau, ein stadas las davosas ordinaziuns dil stat encunter la claustra de Mustér. L'inventarisaziun e l'ugadia fuvan stadas tier autras claustras svizzeras il preludi e l'introducziun della secularisaziun. Tgei effect han quellas mesiras giu per Mustér?

### 16. Enzennas de nova veta amiez las ruinas

Avat Paulus Birker valeva per in bien professor e pedagog. Tonaton reussescha ei ad el mo plaunsiu d'alzar il nivo della scola. L'instrucziun purila, decretada dalla regenza cuntentava buc. Las autoritads circuitalas pretendan perquei da Cuera il remplazzament de quella entras l'introducziun d'in progimnasi. Mo la regenza accepta buca quella proposta e protesta. La scola vegetescha per quei motiv malamein, malgrad ch'igl avat dat sez voluntariamein 7 uras per jamna latin per aschia corrispunder al giavisch dil pievel.

Anno 1867 reussescha ei a Birker d'obtener da Nossadunnaun agid per la scola. Sa sch'igl ei stau ina buna enzenna, ch'ils dus paders Ludovic Stutzer e Franz Salesius Tiefenthal entaupan Garibaldi a Sargans viagiond els a Mustér? En mintga cass fa la scola ussa spert in progress nunspetgau per grond fèl de P. Martin. Gia duront il viadi havevan ils dus paders de Nossadunnaun numnadamen intervegnu, che P. Martin hagi derasau dapertut la tschontscha, ch'ei vegni buca paders d'autras claustras a Mustér, nun ch'ei seigien narradira. Ils dus paders arrivan per ils 18 d'october 67 alla veglia abbazia sper il Rein ed entscheivan immediat cun l'instrucziun. Els s'endisan nunspetgadamein spert allas relaziuns schi mudestas de Mustér. Arranschond els cun lur students representaziuns dramaticas, declamaziuns e pintgas producziuns musicalas, arrivan els spert ad in bien contact cun il pievel. Il diember dils scolars crescha gia suenter in onn per in tozzel sin 35 students. Era il giavisch dellas instanzas cir-

cuitalas de fundar ina scola gimnasiala, severifichescha avon ch' ins spetgava atgnamein. Igl atun 68 dumbran las classas latinas gia nov scholars, empei dils treis digl onn precedent. Alla fin digl onn scolar 1868 engrazia l' autoritad circuitala agl avat de Nossadunnaun cun ina brev officiala per igl agid purschuu.. Mo era las instanzas cantonalas fan buca guoter cun lur laud per la scola claustrala. Il president dil cussegl d' educaziun renconuscha all' occasiun de sia viseta alla scola claustrala dils 9 e 10 de december 68 expressivamein las prestaziuns dils scholars. Medemamein lauda el alla fin dils examens scholars dils 22 d' uost 1869 igl immens progress della scola claustrala. El supplichescha ed intimescha schizun ils dus paders de Nossadunnaun de haver quitau, ch' els astgien restar silmeins per dus onns definitivamein a Muster.

Per igl atun 1869 dat igl onn de scola sia entschatta cun il diember extraordinari de 65 scholars. Il pugn il pli critic ella historia della scola claustrala pareva ded esser dumignaus. En siu rapport al Cussegl Grond constatescha il cussegl d' educaziun il suandont: «La sort de quei institut, ch' ei dapi ils conclus dil Cussegl Grond dall' entschatta dils anno 60 staus suttaposts a tontas midadas e l' existenza dil qual pareva aschi dubiusa e nunsegira, para recentamein de sevolver ad in stadi zun legrei-vel.» Per igl onn 1870 gudognan ins aunc il caplon de Sedrun, Gion Antoni Casanova, sper ils paders de Nossadunnaun per la scola. Quei fuva ina forza schi capavla e buna, che P. Ludovic scriva en in rapport a siu avat, che tenor sia opiniun seigi la scola ussa spindrada, era senza igl agid de Nossadunnaun. Il cussegl d' educaziun lauda medemamein tochen sum la scola della claustra, che fuva avon paucs onns aunc sil precinct ded ir a smer-scha. Gie, el fa schizun menziun, ch' il Cussegl Grond duessi dar alla claustra in susteniment finanziar per ina tiarza classa latina ni conceder ina recepziun de novizs nunlimitada e libra.

## 17. Tut adumbatten, la catastrofa sevischina!

La recepziun de novizs nunlimitada e libra! Cun quella pre-  
tensiun fuva la parola per ina restauraziun propi vera e fritgei-  
vla della claustra dada. Mo cun igl agid exteriur fuva la scola  
buca gidada alla liunga ed aunc bia meins la claustra. La vera  
restauraziun de Mustér stueva pegliar siu catsch per quei pugn.  
Igl avat Birker era perschuadius cumpleinamein de quei factum.  
El intenzionava, gia avon ch' ils paders de Nossadunnaun arri-  
vien, de far per la primavera 1867 ina petiziun al Cussegl Grond  
ded annullar l'ordinaziun dils anno 1861. Materialmein havess  
ins saviu far pintgas objecziuns e reproschas all' argumentaziun  
empau professorala de sia petiziun. Mo igl avat formulescha ses  
giavischs aschi nundiplomaticamein sco mo pusseivel. Tgisà, sch'  
ei fuva prudent d' aunc punctuar expressivamein, ch' ils novizs  
de lieunga tudestga seigien puncto senn per uorden, luvrusadad  
e punctualitad generalmein buca inferiurs als romontschs? Sa  
sch' ei fuva ina argumentaziun ventireivla de pretender alla mo-  
da e maniera suandonta, che la limitaziun della recepziun dils  
novizs vegni annullada: «In um liber, sabi e bein scolau ha seca-  
pescha buca talien d' entrar en ina claustra vasala ed ugadada?»  
Birker haveva senza dubi raschun, communicond al Cussegl  
Grond che la situaziun actuala seigi alla liunga nuncuntenteivla  
e nunpusseivla. Dapertut seigien ins dell' opiniun, che la claustra  
seigi condemnada alla mort cun las condiziuns actualas per ils  
novizs e cun las ulteriuras restricziuns. Mo ei fuva ina utopia ni  
illusiun de crer, che las ordinaziuns cantonalas possien ins liqui-  
dar cun empau scrivem ed uiara de lettras. Il meglier eis ei en  
tutta cass stau, che la petiziun digl avat ei restada en siu tru-  
chet . . . .

E tuttina! Zatgei stueva daventar en quella damonda. Igl  
avat haveva tutta raschun alla fin dils anno 60 de temer, che la  
damonda claustrala savessi midar mal. Mo deplorablamein fuva  
gest el buc igl um per prevegnir als prighels smanatschonts. Gia  
ils dus paders de Nossadunnaun arrivon buca propi a bunas re-  
laziuns confidenzialas cun el e tuornan perquei suenter dus

onns a casa. Per igl atun 1875 tarmetta Nossadunnaun aunc ina gada schizun 4 paders, per corrispunder alla supplica dellas instanzas circuitalas. Mo quels secumportan aunc bia meins cun avat Birker. Dils nov paders, che vivevan all' occasiun della publicaziun dils artechels claustrals digl onn 1861, fuvan treis gia morts tochen 1875 ed in secularislaus. Ils tschun restonts fuvan ualti vegls, per part schizun vegliurds. Dils dus novizs, entrà en claustra duront il guvern digl avat Birker, haveva in puspei stuiu sortir per raschuns de sanadad e l' auter fuva morts. In tierz era vegnius renviaus dagl avat per munconza de talents sufficientes, mo ha allura operau silsunter cun grond success en in' altra claustra!

L' inhabilitad digl avat d' exequir ina reforma e restauraziun claustrala e las nauschas tschontschas dellas relaziuns claustralas, che circuleschan duront siu guvern dapertut en la tiara, leventan la malaveglia dil pievel. Alla conferenza annuala dils anno 1868 a Sion supplicheschan ils uestgs svizzers Nossadunnaun de s' occupar della claustra periclitada de Mustér. Mo igl avat Hendri declara de buc esser el cass de suandar lur supplica. Sia davosa emprova, per la quala schizun la regenza era vegnida gudignada, de spindrar la claustra cun agid d' in superiur d' ordeifer, seigi fallida igl onn 1859 per cuolpa dellas intrigas de P. Martin Andreoli. Tenor sia opiniun stoppi ussa, dadas las actualas ordinaziuns cantonalas aunc existentas, era ina claustra la pli disciplinada ir alla malura.

Era la Congregaziun sa buca s' occupar pli della damonda claustrala. «Curavimus Babylonem et non est sanata: Nus essan sestentai de salvar Babilonia, mo ella ei buca stada de salvar.»

Il sgurdin successiv della claustra sefa era paleis ella publicitad. Cun il fenadur 1876 vegn igl ingant public dils magnifics e zun vegls beins claustrals dil Lucmagn (hospezi cun baghetgs, regress e dretgs d' alp) annunziaus. L' entira tiara che giezza las ureglias e sesmarveglia. Intervegnend la Cadi aunc la nuviala sensazionala, che Nossadunnaun hagi piars tutta speranza de punder spindrar Mustér, eran ins tut consternius. La decadenza e fin della veglia casa de s. Placi pareva inevitabla.